



FIADIDIANA NY REPOBLIKA

TATITRY NY FILANKEVITRY NY MINISITRA LAPAM-PANJAKANA IAVOLOHA- ALAKAMISY 25 JOLAY 2019

FAMPAHAFANTARANA

“Fikajiana sy fitandroana ny fandanium-bolam-panjakana”:

Entitra ny Filoham-pirenena ny amin'ny fitantanana sy ny fandania ny volam-panjakana eny anivon'ny ministera isan-tsokajiny ka tokony hampiharina hoy izy ny atao hoe : « Mercuriale des prix dans la gestion des marchés publics ». Tsy azo ekena ary tsy maintsy iharan'ny famaizana henjana ireo rehetra mihevitra fa tokony handoa vola amin'ny tompon'andraikim-panjakana, mahatratra hatramin'ny 25% ireo orinasa manao tolo-barotra vao mahazo ny asa ampiandraiketina azy ireny. Maro ihany koa rehefa nalefa ny fitsirahana ireo tsenan'asam-panjakana tsy misy akory ireo asa vita fa natao hakana volam-panjakana fotsiny ihany na ilay atao hoe « marché fictifs », ao ihany koa ireo manararaotra ka mampitombo avo 100 ka hatramin'ny 1000 heny ny vidin'entana amidy amin'ny fanjakana izay tsy azo ekena intsony mihitsy ary tsy maintsy henjehina araka ny lalana velona. Ilaina noho izany ny fanarahana akaiky ireo tolotrasa eo amin'ny tsenan'ny asam-panjakana. Tokony hatsaraina ary harafitra tsara ny fandrindrana ny fitsinjarana ireny asa ireny ary mila apetraka ny tombam-bidy mazava izay tokony harahan'ny rehetra eo amin'ny fanatanterahana ny asa.

Mila apetraka ny atao hoe : “Modernisation et moralisation de la gestion des affaires publiques” ka isan'ireo entanina hametraka sy handrindra izany miaraka ny avy ao amin'ny ministeran'ny toekarena sy ny fitantanambola, ny ARMP, ny INSTAT , ny CNM, ny Contrôle financier miaraka amin'ireo ministera sy andrim-panjakana isan-karazany ary ireo rafitra isaky ny faritra ary ireo orinasam-panjakana rehetra. Marihana fa mitombo ary hiparitaka manerana ireo misy asam-panjakana sy tsenam-panjakana ny IGE na ny Inspection Générale de l'Etat mba hikajiana sy hanarahana akaiky ny fandanium-bolam-panjakana, izany koa dia natao hiadiana any amin'ny fanararaotana sy filibana ary fandanium-poana ny volam-panjakana.

FANDRAISANA DIDIM-PANJAKANA

Tapaka tao anatin'ny filankevitry ny minisitra ny fandraisana ny didim-panjakana manaraka etoana :

- Noraisina ny didim-panjakana mampiantso fivoriana manokan'ny Antenimieram-pirenena araka ny voalazan'ny lalàm-panorenana, manomboka ny alatsinainy 12 Aogositra 2019 ny Antenimieram-pirenena Tsimbazaza ary mandritra ny 12 andro.

Laha-dinika amin'izany ny :

- fandania ny fitsipika anatin'ny mifehy ny Antenimieram-pirenena
- ny fandinihana ny tolo-dalana mikasika ny lalàna mifehy ny antoko mpanohitra.
- ny fampahafantaran'ny governemanta ny politika ankapoben'ny fitondram-panjakana.

- Noraisina ny didim-panjakana mampiantso fivoriana manokan'ny Antenimieran-doholona araka ny voalazan'ny lalàm-panorenana, manomboka ny alatsinainy 12 Aogositra 2019 ny Antenimieran-doholona ary mandritra ny 12 andro.

Laha-dinika amin'izany ny :

- Fandinihana ny tolo-dàlana mikasika ny lalàna mifehy ny antoko mpanohitra
- Fampahafantaran'ny governemanta ny politika ankapoben'ny fitondram-panjakana

FANENDRENA

Ny filankevitry ny Minisitra dia nankatoa ny fanendrena ireto mpiasam-panjakana ambony ireto :

Araky ny tolo-kevitra ny Fiadidiana ny Repoblika :

- **Atoa. ANDRIANIRINA Laza Eric Donat**, dia voatendry ho lehiben'ny Birao mahaleotena miady amin'ny Kolikoly (BIANCO).

Araky ny tolo-kevitra ny minisitry ny fitaterana, ny fizahantany ary ny famatarana ny toetrandro :

- **Capitaine de Vaisseau RANDRIANANTENAINA Jean Edmond**, dia voatendry ho Tale Jeneralin'ny APMF.